

FOLLETO MISA CON NENOS

13 de outubro de 2024 Ordinario 28º-B

Evanxeo de Marcos 10, 17-30:

"Vende o que tes e sígueme"



1. MONICIÓN DE ENTRADA

Amigos e amigas:

Benvidos á celebración da Eucaristía no día do Señor, domingo 28 do tempo ordinario. Xesús chámamos a seguilo, aínda que resulte custoso levar adiante a invitación que nos fai. Como facelo? Non obsesionándonos polo diñeiro e os bens materiais senón poñendo a Xesús no centro, sentíndonos orgullosos de que El sexa a nosa riqueza, o noso maior tesouro. Porque podemos *“perdelo todo por ter de todo”*.

SAÚDO do sacerdote: No nome... *O Señor Xesús, que nos mira con agarimo e nos convida a seguilo, sexa con todos vós.*

2. SÚPLICAS DE PERDÓN

Sacerdote: *Pedimos perdón polos pecados persoais e familiares:*

- **Nenos/a:** Ti, Señor, que nos convidas a seguirte. Señor, ten piedade de nós.

- **Catequista:** Ti, Señor, que nos prometes un tesouro no ceo se non nos agarramos aos tesouros da terra. Cristo, ten piedade de nós.

- **Pais:** Ti, Señor, que queres traernos a salvación, a felicidade, un tesouro no ceo. Señor, ten piedade de nós.

Sacerdote: *Deus todopoderoso teña misericordia de nós...*



MONICIÓN ÁS LECTURAS

O libro da Sabedoría dinos que é mellor ser sabio que ter moitas riquezas. Deste xeito prepáranos para o relato do novo rico do evanxeo que preferiu quedar coas riquezas e perdeu o tesouro que é Deus, o único que nos dá a felicidade. A carta aos Hebreos axúdanos a valorar a Palabra de Deus porque nos ensina a elixir ben e xulgar as intencións do corazón.

SABEDORÍA 7,7-11: *Ao lado da sabedoría en nada tiven a riqueza.*

Supliquei e foime dada a prudencia, invoquei e veu a min **o espírito de sabedoría.**

Preferina a cetros e tronos e ao seu lado en nada tiven a riqueza.

Non a equiparei á pedra máis preciosa, porque todo o ouro ante ela é un pouco de area e xunto a ela a prata é como o barro.

Quíxena máis que á saúde e á beleza e preferina á mesma luz, porque o seu resplandor non ten ocaso.

Con ela viñéronme todos os bens xuntos, ten nas súas mans riquezas incontables. *Palabra do Señor.*

SALMO 89

R/. Sácianos da túa misericordia, Señor, e estaremos alegres.

HEBREOS 4,12-13: *A palabra de Deus xulga os desexos e intencións do corazón.*

MARCOS 10, 17-27 (forma breve): *Vende o que tes e sígueme.*

Narrador: Naquel tempo, cando saía Xesús ao camiño, achegóuselle un correndo, axeonllouse diante del e preguntoulle:

Mozo rico: -«*Mestre bo, que farei para herdar a vida eterna?*».

Narrador: Xesús contestoulle:

Xesús: -«*Por que me chamas bo? Non hai ninguén bo máis que Deus. Xa sabes os mandamentos: non matarás, non cometerás adulterio, non roubarás, non darás falso testemuño, non estafarás, honra a teu pai e a túa nai*».

Narrador: El replicoulle:

Mozo rico: -«*Mestre, todo iso cumprino desde a miña mocidade*».

Narrador: Xesús quedou mirándoo con agarimo e díxolle:

Xesús: -«*Unha cousa che falta: anda, vende o que tes, dálo aos pobres, así terás un tesouro no ceo, e logo ven e sígueme*».

Narrador: A estas palabras, el engurrou o cello e marchouse triste porque era moi rico. Xesús, mirando ao redor, díxolles aos seus discípulos:

Xesús: -«*Que difícil lles será entrar no reino de Dios aos que teñen riquezas!*».

Narrador: Os discípulos quedaron sorprendidos destas palabras. Pero Xesús engadiu:

Xesús: - «*Filios, que difícil é entrar no reino de Deus! **Máis fácil lle é a un camelo** pasar polo ollo dunha agulla, que a un rico entrar no reino de Deus*».

Narrador: Eles espantáronse e comentaban:

Apóstolos: -«*Entón, quen pode salvarse?*».

Narrador: Xesús quedou mirándoos e díxolles:

Xesús: -«*É imposible para os homes, non para Deus. Deus pódeo todo*».

Palabra do Señor.

(Narrador- Mozo rico – Xesús -Apóstolos)

4. ORACIÓN DE LOS FIELES

Sacerdote: *Presentemos ao Señor as nosas súplicas con toda a fe e confianza dicindo:*

-Ti, Señor, es a nosa riqueza.

1. Pola Igrexa que nos faga presente a Cristo resucitado e nos ensine a coñecelo e querelo. Oremos.
- 2.- Polos enfermos e os que sofren para que o Señor os encha da súa graza nas dificultades. Oremos.
- 3.- Polos que nos dicimos cristiáns para que acollamos a invitación de Xesús a seguilo sabendo que el é o verdadeiro tesouro. Oremos.
- 4.- Por nós para que nos desprendamos de todo aquilo que nos impida seguilo. Oremos.
- 5.- Polos que acaparamos posesións, para que descubramos que a verdadeira riqueza está en compartir e ter a Deus no corazón. Oremos.
- 6.- Por nós para que aprendamos a ir deixando cousas, amar máis, vivir para Deus. Oremos.
- 7.- Polos que nos reunimos cada domingo, polos anciáns, polas familias con problemas, polos falecidos. Oremos.

Sacerdote: *Pai, escoita as pregarías que che presentamos e derrama sobre nós o Espírito que nos encha de sabedoría. Por XCNS.*



5. PROCESIÓN DE OFRENDAS

- UN CARTEL DO SÍNODO DA IGREXA UNIVERSAL:

Señor, queremos unirnos ao sínodo universal aberto a pasada semana en Roma. Queremos construír xuntos unha igrexa sinodal, que soñemos xuntos a igrexa de Xesús que os tempos actuais necesitan.

-UN COFRE CON MOEDAS OU BILLETES:

Con este cofre cheo de moedas (ou billetes) queremos representar un dos grandes males do mundo, o egoísmo. Que sempre sexamos conscientes de que a riqueza é mala compañía para entrar no ceo, pois ás veces escravízanos e pensamos que tendo diñeiro non necesitamos nada máis.

-O CARTEL DE FANO DESTE DOMINGO:

Xesús, podemos “perdelo todo, por ter de todo”. A auténtica riqueza, a verdadeira felicidade, é terte no corazón, e de aí nace todo o demais. Sen ti viviremos infelices como o mozo do evanxeo.

-PAN E VIÑO:

Co pan e o viño traemos ata o altar a xenerosidade de tantos homes e mulleres no mundo que nos van dando o que teñen. E que nunca nos falte Deus no altar e menos nos nosos corazóns.

6. ACCIÓN DE GRACIAS

- Grazas, Xesús, porque nos miras con agarimo e enches a nosa vida de ledicia e confianza.
- Grazas, Xesús, porque nos ensinas que é máis importante ser boas persoas que ter moitas cousas.
- Grazas, Xesús, porque aínda que deixemos cousas, ti es o noso tesouro, o máis importante.
- Grazas, Xesús, porque quixeches que a túa nai, María, fose tamén a nosa.
- Grazas, Xesús polo agasallo da túa amizade incondicional.
- Grazas, Xesús, polos misioneiros aos que en outubro sempre lembramos.
- Xesús, quero seguirte sempre, que ti guíes o meu proxecto de vida, que relativice todos os meus centros de interese, que aprenda a compartir e a buscar un tesouro no ceo.



7.- ORACIÓN DE GRAZAS

Un tesouro no ceo

Xesús, pásame como aquel mozo rico.
Estou rodeado de cousas, créome novas necesidades, e non paro de mercar todo o que me entra polos ollos.
Pero ti pasas ao meu lado e proposme necesitar menos, ser máis austero, para que os obxectos non me posúan a min.
Pero sabes, Xesús, que me deixo arrastrar pola chamada das modas, da publicidade e polos meus caprichos.
Por iso hoxe, ao ver a tristeza do mozo rico, quero facer un compromiso: ir deixando cousas, amar máis, terte a ti.
Ti, Xesús, es o meu tesouro valioso. Téndote a ti, téño todo: serei feliz e terei un tesouro no ceo.

**FELIZ DOMINGO
DÍA DO SEÑOR**